

Wo reformje hladanskeho zakonja rozprawjała

Budyšin (CS/SN). Zapósłanča zwjazkoweho sejma Marja Michałkowa (CDU) je za wčerawšim stajnym blidom CDU w Budyšinje wo reformje hladanskeho zakonja rozprawjała, kotraž plaći wot spočatka noweho lěta. Jadro reformy je, přestajić strukturu wot dotal třoch scho-dzenkow na nětko pjeć hladanskich stopnjow. Při tym nima nichto njelěpšiny porno dotalnemu rjadowanju. Lěpšina pak je, zo móže nětko kóždy pjenjez, na kotraž ma prawo, wotpowědnje swojej situaciji nałožić. Nowe tež je, zo ma kóždy samsny poplatk plaćić. To je wosebje wulka lěpšina w hladarnjach. Nichto njetrjeba so bojeć, zo dyrbi wyšeho hladanskeho stopnja dla wjacze připlaćić.

Zdobom je zakonjedawar razniše kontrole zawjedł, zo njeby k znjewužiwanju dóšlo. Dokelž je hladanski pjenjez srědk, kotryž solidarna zhromadnosć přewostaja, maja kontrolne gremije – kaž medicinska služba chorobnych kasow – móžnosć njeřipowědźene kontrole přewjesć, maja-li pokiwy na njejasnosće we wotpowědnych wotličanjach.

Marja Michałkowa zwěsći, zo njejsu mzdy a džělowe časy w hladanskich služ-

bach optimalne – a to, byrnjež w hladanskej službje wjacze ludźi džěłało hač w awtowej industriji. Mzdy su w jednotliwych krajach rozdźělne. Sakska steji tule na poslednim městnje. „To njemóže tak wostać“, Michałkowa rjekny. Wona so boji, zo fachowy personal, kotryž tak a tak

hižo pobrachuje, mzdow dla do druhich zwjazkowych krajow wotchadźa. Marja Michałkowa chcyła so tež za to zasadzić, zo so wšitke tři hladanske powołanja – hladar starych, chorobna sotra a džěćaca chorobna sotra – do samsneje mzdoweje skupiny zastopnjuja.



Marja Michałkowa wčera w Budyšinje

Foto: Carmen Schumann